

Opinion di Hulandes lo ta diferente na esun di expertonan local

CHARRO A MANDA BUSCA HULANDES PA SOLUCIONA DUMP!

Gobierno ta tene duro pa mantene dump na Parkietenbos

ORANJESTAD(AAN) Ariba cabez di tur experto local y na un forma completamente incomprendible Ministro Charro Kelly a realiza su ultimo hazafia. Informenan ta indica cu Ministro Kelly a dicidi di manda busca un Hulandes pa bin duna Gobierno recomendacionnan ariba e situacion di dump. Tin indicacion cu e salto aki no ta nada mas cu un intento pa mantene e dump na Parkietenbos contra tur conseho di expertonan local.

E problemanan pa deshaci di sushi no ta asunto di awor. Pa basta tempo ta conoci cu mester soluciona e problemanan cu tin cu e dump na Parkietenbos caminda huma y condicionnan contra higiene ta caba cu e habitantenan. Tambe mester a busca un solucion pa e dump nobo cu a worde forma pariba di brug.

Expertonan local lo a yega na e conclusion cu mester elimina e dump na Parkietenbos y opta pa creacion di un dump na e sitio pariba di brug caminda mester stop di kima sushi tambe. E solucion cu a keda presenta pa expertonan local tabata pa cambia e dump pariba di brug den un landfill caminda ta dera sushi. Asina ta crea un sistema di dera sushi loke ta evita cu cierto barionan lo haya problema cu kimamento di sushi.

Na mes momento ta un hecho cu e dump pariba di brug por worde controla mihor. Control ta sumamente necesario na un landfill tambe pasobra ta bay deponer sushi den tera. Ta necesario pa durante 20 pa 30 aña sigui vigila loke ta pasa den suelo cu e sushi cu a worde dera.

E dump na Parkietenbos no ta presta su mes pa e actividadnan di un landfill. Ya e ta mucho haltu y ta worde calcula cu e ta keda un diez meter ariba superficie di lamar.

Espacio pa amplia e dump na Parkietenbos no ta presente. Pariba tin un rooi y pa zuid tin lamar. Pabao tin matanan y tin e sitio caminda piscanan ta bruy. No por amplia den e direccion aki sin causa un desastre ambiental.

Si dicidi di cera e dump pariba di brug y laga esun na Parkietenbos habri como landfill aki cuatro pa cinco aña e lo keda yen sin e garantia di control necesario cu tur problema cu esey por trece cune.

Sumanan enorme lo bay worde gasta pa converti e actual dump den un landfill caminda ta dera sushi. Pesey expertonan local lo ta di opinion cu mester cera e landfill na Parkietenbos y habri un landfill pariba di brug.

Informenan ta indica cu Gobierno a bay di acuerdo cu e plannan aki y hasta

tin un decision di Ministronan den e asunto aki. Pero e decision a keda tranca pa motibonan politico cu a haci cu e politiconan ta considera cu ta mihor pa causa mas problema na Parkietenbos cu tuma decisionnan na interes di henter Aruba.

Awor Ministro Charro Kelly a dicidi di bay laga un Hulandes bin duna recomendacion y tin tur indicacion cu Gobierno lo worde complaci. Aunke e Hulandes a scucha expertonan local aparentemente e kier sigui cu e plannan desea pa Gobierno. Esey kier meen cu ta bay gasta placa pa transforma e dump na Parkietenbos den un landfill pa cuatro of cinco aña pa despues busca otro lugar pa crea landfill cu tur gasto involvi atrobe.

"Pueblo lo mester bolbe bay paga pa un mal maneho cu lo bay tin consecucionan serio" informantenan a bisa. Expertonan local ta keda di opinion cu mester cera e dump na Parkietenbos y isola e sitio. Pero Gobierno tin su propio opinion y awor mester sali na cla si mescos cu a pasa cu e Aseguro Medico General no a busca refugio cerca Hulandes pa asina deseo di Gobierno keda cumpli a pesar di tur e problemanan cu expertonan local ta visualiza.

PREGUNTANAN DI MR. GONZALEZ NA MINISTRONAN

ORANJESTAD (AAN) Segun Articulo III.17 di nos Constitucion y segun articulo 59 di Reglamento di Orden di Staten di Aruba. E siguiente preguntanan di e miembro di Parlamento Sr. Mr. H.E. Gonzalez na Ministro Presidente y Ministro di Finanzas.

1. - Srs. Ministro por confirma noticianan periodistico cu gobierno actual lo a comberti e empresa publico WEB den un NV?

2. Srs. Ministros por confirma cu tal "oprichting van een privaatrechtelijke rechtspersoon" segun articulo 27 di Comptabiliteitsverordening 1989 mester di "machtiging verkregen bij landsverordening" siendo cu interes financiero di sigur mas di F. 100.000, =? Si ta menos di F. 100.000, = (WEB) ta representa un balor di miyones!) anto lo mester di un Landsbesluit cu opinion di Raad van Advies y Staten?

3. - Srs. Ministros por indica si tal "machtiging" di Staten a worde obtene y si tal oprichting a tuma lugar cu tal "machtiging"?

4. - Srs. Ministros por confirma cu gobierno a firma un CAO cu sindicatonan di trahadornan publico (ambtenaarnan) di WEB y si ta asina a base di cual ley tal CAO a worde firma?

5. - Srs. Ministros ta dispuesto pa facilita Staten copia di tal CAO hunto cu contestanan riba preguntanan anterior?

JOHNNY FINGAL A ENTREGA RAPORT NA GOBIERNO



ORANJESTAD (AAN) Durante e periodo di Augustus te cu December 1991, Sr. Johnny Fingal tabata na Hulanda pa specialista su mes den Educacion di Naturalesa y Medio Ambiente.

Sr. Fingal ta funcionario di e Direccion di Enseñanza Aruba y ta e prome Arubiano cu ta haci e estudio mencion, cual ta encera entre

otro con pa usa informacion, maneho, formacion di maneho y comunicacion pa massa pa obtene conducta sano encuanfo di naturalesa y medio ambiente. Uso ta ser haci di e mesun media y tecnicas cu ta ser usa pa otro intervencionnan comunicativo manera avisonan y propaganda, relacionnan publico y educacion.

Sr. Fingal a regresa Aruba pa ehecuta su plan di campaña pa limpieza na Serlimar, relaciona cu su estudio.

Paralelo na su estudio Sr. Fingal a traha un rapport entitula "Aruba, dushi tera". E rapport a ser entrega na gobierno di Aruba y a worde ricibi pa Ministro di Bienestar General Sr. Freddy Refunjol. Contenido di e

rapport ta describi un proyecto global cu e meta principal "Mantenion, recuperacion y desaroyo duradero di aprecio pa nos naturalesa y paisahenan, e historia, cultura y identidad di nos pais. Na Augustus 1992 Sr. Fingal lo termina su estudio na Hulanda.

TA BUSCA PA TRAHA

NA ONE HOUR PHOTO N.V.

SEAPORT Village Mall

1 DRIVER CU RIJBEWIJS
12 VERKOOPSTERS MALE/FEMALE

Mester tin bon presencia

Mester ta di bon salud

Mester ta balente

Oportunidad pa trabao
Acudi personalmente
Entre 9or am y 6or pm